

三  
國  
志  
注  
補

三國志注補卷十

仁和趙一

魏志列傳第十

行至苑陵

前漢書地理志河南郡苑陵

視事三日策拜司空爽起自布衣九十五日而至三公

後漢書荀淑傳爽見董卓忍暴滋甚必危社稷其所辟舉皆  
取才略之士將共圖之亦與司徒王允及卓長史何顒等爲  
內謀會病薨

注昔蒯姻於王氏無損清高之操緹之此婚庸何傷乎

姜云募勢固不可禍亦有不得避者高陽里與宦豎婚豈知

三國志卷之十  
有羞恥乎且傳公明亦未聞以辭婚見罪此等邪論足以遺  
誤後生

永漢元年舉孝廉拜守宮令

後漢書百官志守宮令六百石主御紙筆墨及尚書財用諸  
物及封泥

布乘虛寇暴民心益危唯鄆城范衍可全

前漢書地理志濟陰郡鄆城東郡范畔觀後漢書郡國志志  
衛國公本觀光武更名

注引軍從泗南攻取慮睢陵夏邱諸縣皆屠之

後漢書郡國志彭城國武原下邳國取慮睢陵夏邱故屬沛  
或勸太祖曰昔高祖東伐

後漢書或傳昔字下有晉文公納周襄王而諸侯景從句

注補衡傳曰衡南見劉表表甚禮之

後漢書衡傳劉表及荊州士大夫先服其才名甚賓禮之文章言議非衡不定表嘗與諸文人共草章奏並極其才思時衡出還見之開省未周因毀以抵地表悔然爲駭衡乃從求筆札須臾立成辭義可觀表大悅益重之

注將軍黃祖兵屯夏口祖子射與衡善隨到夏口祖嘉其才

衡傳衡爲作書記輕重跪容各得體宜祖持其手曰處士此正得祖意如祖腹中之所欲言也祖長子射爲章陵太守尤善於衡嘗與衡俱游共讀蔡邕所作碑文射愛其辭還恨不繕寫衡曰吾雖一覽猶能識之惟其中石缺二字爲不明耳

因書出之射馳使寫碑還校如衡所書莫不歎伏射大會賓  
客人有獻鵲鵠者射舉厄於衡曰願先生賦之以娛嘉賓衡  
攬筆而作文無加點辭采甚麗隋經籍志顧衡集二卷又錄  
一卷

注衡後驕蹇荅祖言俳優饒舌祖以爲罵已也大怒顧伍伯捉  
頭出左右遂扶以去拉而殺之

衡傳黃祖在蒙衝船上大會賓客而衡言不遜顧祖慙乃訶  
之衡更熟視曰死公云等道祖大怒令五百將出欲加筆衡  
方大罵祖恚遂令殺之祖主簿素疾衡卽時殺焉射徒跣來  
救不及祖亦悔之乃厚加棺斂衡時年二十六世說注引衡  
別傳罵祖死鍛錫公

注又潘勗爲瑛碑大稱瑛姿奇表

宋書禮志徐爰曰俗說峽本未有岐昔文若巾之行觸樹枝成岐謂之爲善因而弗改通以爲慶弔服巾以葛爲之形如峽而橫著之

注過不易衣吏呵之衡乃當太祖前以次脫衣裸身而立徐徐乃著禪冒畢復擊鼓參搥而顏色不作太祖大笑告四坐曰本欲辱衡衡反辱孤至今有漁陽參搥自衡造也

衡傳曹操問衡善擊鼓乃召爲鼓史諸史過者皆令脫其故衣更著岑牟單絞之服次至衡衡方爲漁陽參搥蹀躞而前又世說曰肅衡被魏武請爲鼓吏正月半試鼓衡揚枹爲漁陽搥搥淵淵有金石聲孔融曰肅衡罪同胥靡不能發明王

三國志卷十  
之夢魏武慙而赦之

注唯以爲不能斷功不濟者必由此也

功一本作終

注昨日仲將又來慙性貞實文慙篤誠

慙當作敏

注端從涼州拔徵爲太僕

拔一本作牧當是

紹益驕與太祖書其辭悖慢太祖大怒出入動靜變於常

何云此書卽陳琳所作檄豫州將校文也操陽怒以激其士

卒耳

六年太祖就寢東平之安民

水經濟水注安民亭北對安民山東臨濟水方輿紀要卷三

十三安民亭在東平州西南

注閔從孫惲字景文太子中庶子亦知名與賈充共定音律又

作易集解

謹案今荀爽九家集解疑卽惲所作

惲當作煇隋經籍志魏散騎常侍荀煇注周易十卷

注張璠漢紀稱悅清虛沈靜善於著述建安初爲秘書監侍中被詔刪漢書作漢紀三十篇因事以明臧否致有典要其書大行於世

後漢書悅傳獻帝好文學悅志在獻替而謀無所用乃作申鑒五篇帝嘗以班固漢書文繁難省令悅攸左氏傳體以爲漢紀三十篇詔尙書給筆札辭約事詳論辨多美



十七年董昭等謂太祖宜進爵國公九錫備物以彰殊勳密以  
諮彧彧以爲太祖本興義兵以匡朝寧國秉忠貞之誠守退讓  
之實君子愛人以德不宜如此太祖由是心不能平會征孫權  
表請彧勞軍於譙因輒畱彧

彧傳操表畱彧曰臣聞古之遺將上設監督之重下建副貳  
之任所以尊嚴國命謀而鮮過者也臣今當濟江奉辭伐罪  
宜有大使肅將王命文武並用自古有之使持節侍中守尚  
書令萬壽亭侯彧國之重臣德洽華夏旣停軍所次便宜與  
臣俱進宣示國命威懷醜虜軍禮尙速不及先請臣輒畱彧  
依以爲重

注宜集天下大才通儒攷論六經刊定傳記存古今之學除其

煩重以一聖眞竝隆禮樂漸敦教化則王道兩濟

何云不及時圖之則宿儒老生日就衰落後生一失派別則聖籍湮微復尋其緒爲力甚難此苟令君所以汲汲於兩濟也

注獻帝春秋曰董承之誅伏后與父完書言司空殺董承帝方爲報怨完得書以示或或惡之久隱而不言完以示妻弟樊普普封以呈太祖太祖陰爲之備或後恐事覺欲自發之因求使至鄴

姜云若依此書苟令君全無主持何爲謀士恐史傳之譌

注及齋璽書犒軍飲饗禮畢或留請問太祖知或欲言封事指而遣之或遂不得言或卒於壽春壽春亡者告孫權言太祖使

或殺伏后或不從故自殺

宋景文筆記云荀彧之於曹操本許以天下及議者欲加九錫彧未之許非不知許欲出諸己耳操不悟遽殺之然則天奪其爽以誅彧寧不信乎一清案彧之得禍與劉穆之慙忿而死正同後人猶欲寬其罪吾不取也

注嘗難鍾會易無互體見稱於世

晉書荀顗傳又與扶風王駿論仁孝孰先

注繁常以婦人者才智不足論自宜以色爲主

世說曰荀奉倩與婦至篤冬月婦病熱乃庭中自取冷還以身熨之婦亡後少時亦卒以是獲譏於世奉倩曰婦人德不足稱當以色爲主裴令聞之曰此乃是興到之事非盛德之

言冀後人未味此語

注崧子美字令則

晉書荀崧傳二子蕤美蕤字令遠有儀操風望爲簡文帝所重官建威將軍吳國內史子籍仕至散騎常侍大長秋

注于寶晉紀曰武帝使侍中荀顗和嶠俱至東宮觀察太子顗還稱太子德識進茂而嶠云聖質如初孫盛曰遣荀顗其餘語則同

晉書荀勗傳勗字公曾漢司空爽曾孫祖隸射聲校尉父盼早亡勗依於舅氏從外祖鍾繇曰此兒當及其曾祖

注荀氏家傳曰衛子所字伯旗

案所當作旂晉有樂安孫旂亦字伯旗可證也

事垂就而覺收顯攸繫獄顯憂懼自殺

後漢書何顯傳顯南陽襄鄉人董卓秉政與司空荀爽司徒王允等共謀卓會爽薨顯以他事爲卓所繫憂憤而卒  
注使并置顯尸而葬之於爽冢傍

顯傳置作致

注恨心未附

附一本作一

乃引沂泗灌城

前漢書地理志泰山郡益注沂水南至下邳入泗

注臣松之案諸書韓莫或作韓猛或云韓若未詳孰是

武紀注引曹瞞傳曰斬其騎督韓莒子豈卽莫乎

於是封陵樹亭侯

水經渠水注曰長明溝水北分爲康溝東逕平陸縣故城北  
建武元年以戶不滿三千罷爲尉氏縣之陵樹鄉又有陵樹  
亭建安中封尙書荀攸爲陵樹亭侯故陳畱風俗傳曰陵樹  
鄉故平陸縣也

攸深密有智防自從太祖征伐常謀幕帷幄時人及子弟莫知  
其所言

何云攸後陵夷豈以陰謀故邪

後轉封邱陽亭侯

疑是陽邱前漢書王子侯表有楊邱共侯安方輿紀要卷三  
十一陽邱城在濟南府章邱縣東南十里

注七州席卷屠三十六萬方

萬字衍因下方字誤增三十六方見後漢書皇甫嵩傳而靈  
帝紀作三十六萬注引後漢書作三十六萬餘人孫堅傳亦  
作三十六萬恐皆後人誤改

注昔韓信不忍一鎗之遇而棄三分之利

後漢書利作業

注如此則攻守無堅城不招必影從

何云人心未忘漢而擁兵作逆必且變生麾下身膏齊斧以  
膺禍始之罰使嵩聽之則董卓之前驅耳忠導人作賊卒爲  
賊所迫脅憤慨而死其氣焰有以取之矣一清案不字疑誤  
注如有主聰不察

主一本作至

注英雄記曰涼州賊王國等起兵共劫忠爲主統三十六部號車騎將軍忠感慨發病而死

後漢書董卓傳韓遂等共廢王國而劫故信都令漢陽閭忠使督統諸部忠感恚病死

詔以太尉掾爲平津都尉

平津卽小平津也方輿紀要卷四十八小平城在孟津縣西北城北有河津曰小平津津上有城靈帝時河南八關之一也

注豈不由賈翊片言乎詔之罪也一何大哉自古兆亂未有如此之甚



何云謂涼州人爲此救死當咎王允不得獨恨謝也

注司隸榮邵

後漢書百官志注獻帝分置左右僕射建安四年以榮邵爲  
尙書左右僕射是也獻帝起居注曰邵卒官贈執金吾

是時將軍段熲屯華陰

宋書百官志安西將軍一人後漢末段熲居之後漢書董卓  
傳注引魏志曰熲武威人又卓傳云車駕至華陰靈輅將軍  
段熲具服御及公卿以下資儲請帝幸其營初楊定與熲有  
隙遂誣熲欲反乃攻其營十餘日不下而熲猶奉給御膳廩  
膳百官絕無二意李傕郭汜來救熲定爲汜所遮亡奔荊州  
注引袁宏記曰熲與楊定有隙迎乘輿不敢下馬揖馬上侍

中种輯素與定親乃言段煨欲反上曰煨屬來迎何謂反對  
曰迎不至界拜不下馬其色變必有異心太尉楊彪等曰煨  
不反臣等敢以死保車駕可幸其營董承楊定言曰郭汜今  
且將七百騎來入煨營天子信之遂露次於道南

太祖曰善乃并兵出圍擊紹三十餘里營破之

里字疑衍

注魏略曰文帝得翊之對太祖故卽位首登上司

得卽德也古通也御覽卷二百七引齊職儀曰黃初三年日  
蝕奏免太尉賈詡詔曰天地災害責在朕躬勿貶三公遂永  
爲制

進爵魏壽鄉侯

後漢書郡國志武陵郡漢壽故索陽嘉三年更名魏改爲魏壽故蜀又改葭萌爲漢壽也

注世語曰模晉惠帝時爲散騎常侍護軍將軍模子允允弟龕從弟疋

晉書賈疋傳疋字彥度魏太尉詡之曾孫少有志畧器望甚偉愍帝以爲驃騎將軍雍州刺史封酒泉公爲胡彭夫護所害疋以匡復晉室爲己任不幸顛墜時人咸痛惜之

注世之論者

陳少章云世之論者上當有書名或前人名氏今脫畧

注及至霸業旣隆翦漢迹箸然後亡身殉節以申素情全大正於當年布誠心於百代可謂任重道遠志行義立謂之未充其

殆誣歟

何云如魏武者豈能終爲純臣恨文若辨之不早有王佐之才而必欲自見遂不暇於擇主不如孔明潛見皆合龍德

益陽蔡芳初校

宿松羅忠濟覆校

三國志注補卷十

陽湖吳翊寅再覆校

三國志注補卷十一

仁和趙一清撰

魏志列傳第十一

袁渙字曜卿

太康縣有袁渙碑亦見許靖傳例以曜卿之字渙當作煥

注陳羣父子時亦在布之軍

之字衍

拜爲沛南部都尉

前漢書地理志沛郡靳縣都尉治

注魏書曰穀熟長呂岐善朱淵袁津

袁何氏校改爰

注遣使行學召用之

召上一本有還字

教曰以太倉穀者官法也以垣下穀者親舊也

水經阪水注倉垣城卽大梁之倉垣亭也

又帝聞渙昔拒呂布之事

又字何云北宋本作文

注袁氏世紀曰

隋經籍志袁煥集五卷錄一卷

注箸書十餘萬言論治世之務爲易周官詩傳及論五經滯義  
聖人之微言以傳於世此準之自序也

隋經籍志袁子正論十九卷政書二十五卷袁準撰

徽弟敏有武藝而好水功官至河隄謁者

宋百官志都水使者一人掌舟航及運部秦漢有都水長丞主陂池灌溉保守河渠屬太常漢東京省都水置河隄謁者魏因之漢世水衡都尉主上林苑魏世主天下水軍舟船器械

拜議郎遷伊闕都尉

伊闕都尉卽靈帝八閼都尉之一

國淵字子尼樂安益人也

後漢書郡國志泰山郡益沂水出又樂安國益侯國故屬北海方輿紀要卷三十五益城在莒州沂水縣西北七十里益縣卽青州府之益都縣也今云樂安益未詳豈益字相因

致誤邪

時有投書誹謗

謗下一本有者字

田疇字子泰

後漢書劉虞傳注引魏志云字子春

疇乃歸自選其家客與年少之勇壯募從者二十騎俱往

虞傳與疇同行者尙有從事鮮于根募一本作募

疇乃更上西關出塞傍北山直趣朔方

方輿紀要卷十西關卽居庸也胡三省曰疇蓋由居庸歷陰

山而西

虞已爲公孫瓚所害疇至謁祭虞墓



拾遺記劉虞爲公孫瓚所害疇追慕無已往虞墓設雞酒之  
禮慟哭之音動於林野翔鳥爲之悽鳴走獸爲之吟伏疇臥  
於草間忽有人通云劉幽州來欲與田子泰言平生之事疇  
神悟遠識知是劉虞之竟旣近而拜疇泣不自支因相與進  
雞酒疇醉虞曰公孫瓚求子甚急宜竄伏以避害疇拜曰聞  
君臣之義生則盡禮今見君之靈願得同歸九地死且不朽  
安可逃乎虞曰子萬古之貞士也深慎爾儀奄然不見疇亦  
醉醒

君仇不報吾不可以立於世遂入徐無山中

後漢書郡國志右北平徐無方輿紀要卷十一徐無山在薊  
州玉田縣東北二十里

疇皆拒不畱

畱當作受

明日出令曰田子泰非吾所宜吏者卽舉茂才

宋百官志漢武元封四年令諸州歲各舉秀才一人後漢選  
光武諱改茂才魏復曰秀才

拜爲菑令

後漢書郡國志勃海郡脩故屬信都漢志注師古曰脩音條  
一清案周亞夫封條侯師古曰縣在勃海地理志作菑字  
音同耳師古之云蓋古本漢書也

注傷析離居

傷乃蕩之譌

注時加禮命

時字何氏校改特

注融集有融荅脩教曰

隋經籍志後漢少府孔融集九卷梁十卷錄一卷

注可謂不患無位之德

德一本作士

時膠東多賊寇

後漢書郡國志北海國膠東

譚之敗劉詢起兵潞陰

後漢書郡國志平原郡潞陰

譚更以統爲樂安太守

後漢書郡國志樂安國高帝四年置爲千乘郡永元七年更名

注魏略曰脩爲司金中郎將

後漢書百官志郡國鹽官鐵官本屬司農中興皆屬郡縣至曹公始置司金中郎將以主之利權悉歸於上矣魏都賦曰藏之藏富有無隄同版大內控引世資劉逵注白藏庫在西城下有屋一百七十四間水經漯水注沙陵魏金田之地也又案御覽卷二百四十一引魏畧脩爲上有河止始開治遂以七字

謹案治疑治之誤

頃之病卒官

寰宇記卷二十四王脩墓在密州安邱縣西四十七里又引

晏氏齊記曰慈阜王脩葬此俗以叔治脩字之孝故以慈表稱

注王隱晉書曰

隋經籍志晉書八十六卷本九十三卷今殘缺晉著作郎王隱撰

注脩一子名儀字朱表高亮雅直司馬文王爲安東儀爲司馬東關之敗文王曰近日之事誰任其咎儀曰責在軍帥文王怒曰司馬欲委罪於孤耶遂殺之

御覽卷四百五十九王脩誠子書曰我實老矣所恃汝等也汝今踰郡縣越山河離兄弟去日下者欲令見舉動之宜勸高人遠節間一得三父欲令子善唯不能殺身其餘無惜也注讀詩至哀哀父母

宋板讀上有每字

注未留不反覆流涕泣下沾襟

晉書竊傳門人受業者並廢蓼莪之篇又曰母性畏雷母沒每雷輒到墓曰喪在此

注安邱令以爲見已

後漢書郡國志北海國安邱

注姊妹皆遠

姊妹上喪傳有昔嫁二字文義尤明

注喪思土不冑去賊害之

城家記王喪墓在濰縣南三十里之營邱社

黃巾起原將家屬入海住鬱洲山中

山海經海內東經都州在海中一日郁州郭璞注今在東海  
朐縣界世傳此山自蒼梧從南徙來郁州卽鬱洲也山洲二  
字本誤倒今改正

太祖征吳原從行卒

水經汶水注汶水又東北逕柴阜山北山之東有徵士祁原  
冢碑誌存焉寶宇記卷二十四祁原墓在安邱縣北五十里  
注欲遠游學詣安邱孫崧

後漢書郡國志北海國安邱有渠邱亭方輿紀要卷三十五  
安邱故城在青州府安邱縣東北漢安邱有二一屬北海卽  
此安邱也一屬瑯琊在今縣東南建武五年張步降封安邱  
侯尋省瑯琊之安邱而北海之安邱如故一清案前漢書地

理志北海安邱注孟康曰今渠邱是康三國魏人豈是時改安邱爲渠邱乎

注舉之若是般之非也

般之上一本有則字

注融書喻原曰脩性保真

真一作貞

注於是里中遂歛其錢以爲社供

御覽卷五百三十二引原別傳曰里老爲之頌曰邴君行仁遼邑無虎邴君行廉路樹爲社

注後原欲歸鄉里止於三山

方輿紀要卷三十四三山島在萊州府北五十里海之南岸



史記封禪書八祀四曰陰主祠三山

注度知原之不可復追也因曰邠君所謂雲中白鶴非鶉鷃之網所能羅矣又吾自邠之勿復求也遂免危難

世說注引原別傳曰原避地遼東公孫度厚禮之中國既密欲還鄉里爲度禁絕原密自治嚴謂部落曰移比近郡以觀其意皆曰樂移原舊有捕魚大船請其落皆令熟醉因夜去之

注是時海內清議云青州有邠邠之學

何云鄭公業亦以鄭邠並言非家傳妄相推高之語

注太祖北伐三郡單于還位昌國

後漢書郡國志齊郡昌國

河南尹扶風龐迪

迪一本作迪

永寧太僕東郡張閭

三少帝紀注作張閭

管寧字幼安北海朱虛人也

名勝志管公都在安邱縣西南四十五里魏管寧家於此  
與平原華歆同縣郡原相友俱游學於異國竝敬善陳仲弓

幼安爲陳球弟子水經渭水注下相縣故城西北有漢太尉  
陳球墓墓前三碑是弟子管寧華歆等所造世說曰管寧  
華歆共園中鋤菜見地有片金管揮鋤與瓦石不異華捉而  
擲去之又嘗同席讀書有乘軒冕過門者寧讀如故歆廢書

出看盛割席分坐日子非吾友也

注皇甫謐高士傳曰

隋經籍志高士傳六卷皇甫謐撰

王烈者字彥方

何云本爲彥考後漢書烈傳注可據方字自是後人改定止  
宋本正作考晉書嵇康傳康遇王烈入山烈嘗得石髓如  
飴卽自服半餘半與康皆凝而爲石又於石室中見一卷素  
書遽呼康往取輒不復見烈乃歎曰叔夜趣非常而輒不遇  
命也

明帝卽位太尉華歆遜位讓寧

世說注引魏略曰寧少恬靜常笑酈原華子魚有仕宦意及

歆爲司徒上書讓寧寧聞之笑曰子魚本欲作老吏故榮之

百

臣元年十一月被公車司馬令所下州郡八月甲申詔書徵臣  
後漢書百官志公車司馬令一人六百石掌宮南闕門凡吏  
民上章四方貢獻及徵詣公車者

詔書問青州刺史程喜寧爲守節高乎審老疾延頓邪

何云成寧節操者程喜也

貢說寧常著皂帽布襦袴布裙

杜甫詩皂帽仍兼似管寧又管寧紗帽淨卽本此傳

注高士傳曰管寧自越海及歸常坐一木榻積五十餘年未嘗  
箕股其榻上當膝處皆穿

何云以未嘗箕股稱之則當時之人不皆危坐但胡床未行耳向栩傳云坐板牀積久乃有膝蹠足指之處亦以能危坐異之

於是特具安車蒲輪束帛加璧聘焉

藝文類聚載桓範薦管寧表臣聞殷湯聘伊尹於畎畝之中周文進呂尚於渭水之濱竊見東莞管寧束脩著行少有令稱州閭之名亞故太尉華歆遭亂浮海遠客遼東於混濁之中履潔清之節篤行足以厲俗清風足以矯世以簞食瓢飲過於顏子漏屋敝衣踰於原憲唐堯寵許由虞舜禮支甫夏禹優伯成文王養夷齊及漢祖高四皓之名屈命於商於之野史籍歎述以爲美談陛下詔五帝之鴻烈並三王之遺軌

唐期受命光昭百代仍有優崇之禮於大夫管寧寵以上卿之位榮以安車之稱斯之爲美當在魏興流之無窮明世之高士也臣以爲旣加其大不受其細可重之以元纁聘之以殊禮矣

管寧卒

水經汶水注朱虛縣東北逕管寧冢東故晏謨言柴阜西南有魏獨行君子管寧墓墓前有碑寰宇記卷二十四管寧墓在安邱縣西十二里

注故著氏姓論以原本世系文多不載

隋經籍志管寧集三卷錄一卷

注寧之亡天下知與不知問之無不嗟歎醕德之所感若此不

亦至乎

困學紀聞云管幼安如郭林宗天子不得臣諸侯不得友蘇文定贊之曰少非漢人老非魏人何以命之天之逸民

袁紹前後辟命不應移居上黨并州牧高幹表除樂平令不就方輿紀要卷四十山西平定州樂平縣漢沾縣地屬上黨郡後漢因之三國魏析置樂平縣

昭乃轉居陸渾山中

水經伊水注伊水又東北涓水注之水出陸渾西山卽陸渾都也尋郭文之故居訪胡昭之遺像世去不停莫識所在方輿紀要卷四十八陸渾山在河南嵩縣東北四十里一名方山御覽卷九百六十七引嵩高山記云魏文帝時嵇叔夜胡

昭在此學桃樹見在

注高士傳曰初晉宣帝爲布衣時與昭有舊同郡周生等謀害帝昭聞而步陟險邀生於崤澗之間止生

方輿紀要卷四十六三崤山在河南永寧縣北六十里其地或謂之崤澗或謂之澗隘或謂之崤塞有盤崤石崤千崤之山是爲三崤

建安二十三年陸渾長張固

宏農郡陸渾

注文士傳曰楨字元幹廬江人有文學器幹

隋經籍志何楨集一卷梁五卷

注容貌甚偉歷幽州刺史廷尉入晉爲尙書光祿大夫



史通人物篇云當三國異朝兩晉殊宅若元則仲景時才重於許洛何楨許詢文雅高於揚豫而陳壽國志王隱晉史廣列諸傳而遺此不編斯亦網漏吞舟過爲迂闊者一清案楨入晉歷任顯位非終魏臣以規承祚所未喻矣

注司空文穆公充惲之孫也貴達至今

晉書何充傳充字次道祖惲豫州刺史父徽安豐太守外戚傳何準字幼道穆章皇后父也高尚寡欲州府交辟並不就兄充爲驃騎將軍勸其令仕準曰第五之名何減驃騎準兄弟中第五故有此言孝友傳何琦字萬倫充之從兄也祖父龕後將軍父阜淮南內史

至熹平二年

熹當作嘉

初昭善史書與鍾繇邯鄲涑衛覲韋誕並有名尺牘之迹動見模楷焉

張懷瓘書斷曰昭少而博學不慕榮利有夷皓之節甚能撻書真行又妙衛恆曰胡昭與鍾繇並師劉德升俱善草行而胡肥鍾瘦尺牘之迹動見模楷羊欣云胡昭得張芝骨索靖得其肉韋誕得其筋張華云胡昭善隸書茂先與荀勗共整理記籍又立書博士置弟子敎習以鍾胡爲法可謂宿士矣注魏略曰焦先字孝然建安初先畱陝界至十六年關中亂先失家屬獨竄於河渚間

水經河水注河水又南漢水入焉水出汾陰縣南四十里西

去河三里平地開源濟泉上湧大幾如輪深則不測俗呼之爲漢魁古人壅其流以爲陂水種稻東西二百步南北一百餘步與邵陽漢水夾河中渚上又有一漢水皆潛相通方輿紀要卷二十五焦山在鎮江府東北九里江中以後漢處士焦先隱此而名一清案孝然未嘗至吳蓋俗傳耳

注損視聽不以汙其耳目

損字何氏校改捐

注魏氏春秋曰故梁州刺史耿黼以先爲仙人也北地傳玄謂之性同禽獸並爲之傳而莫能測之

神仙傳焦先年百七十歲常食白石以分與人熟煮如芋食之日日人山伐薪以施人先自村頭一家起周而復始負薪

以置人門外人見之鋪席與坐爲設食先便坐亦不與人語  
負薪來如不見人便私置於門間便去連年如此及魏受禪  
居河之湄結草爲菴獨止其中不設牀席以草褥視坐其身  
垢汚濁如泥潦或數日一食行不由徑不與女人交游衣敝  
則賣薪以買故衣著之冬夏單衣遭野火燒其菴人往視之  
見先危坐菴下不動火過菴燼先方徐徐而起衣物悉不焦  
灼又大雪人屋多壞先菴倒人往不見所在恐已凍死乃共  
拆菴求之見先熟臥於雪下顏色赫然氣息休休如盛暑醉  
臥之狀人知其異多欲從學道先曰我無道也後與人別去  
不知所適博物志曰近魏明帝時河東有焦生者裸而不衣  
處火不焦人水不凍杜恕爲太守親所呼見皆有實事

注初平中山東人有青牛先生

先生下一本有者字

蓋是貢禹兩龔之匹

一清案袁邠而外尙有程仲寶字記程徵君墓在開封府封邱縣南四里魏書程仲字孔禮陳畱封邱人有志行明帝青龍三年徵不就景初二年正始五年徵又不就晉武帝太始三年卒封元鄉亭侯

益陽蔡芳初校

宿松羅忠濟覆校

陽湖吳翊寅再覆校

三國志注補卷十一

三國志注補卷十二

仁和趙一清撰

魏志卷第十二

崔琰字季珪清河東武城人也少樸訥好學擊劍尚武事年二十三鄉移爲正

何云此正疑卽正卒美卒之正

乃結公孫方等就鄒玄受學學未暮徐州黃巾賊攻破北海玄與門人到不其山避難

前漢書地理志琅邪郡不其如淳曰其音基後漢書郡國志作不期屬東萊蓋山在其境也方輿紀要卷三十六不其山在膠州卽墨縣東南四十里續志注引三齊記云鄒玄教授

不期山山下生草大如薤葉長一尺餘堅韌異常土人名曰  
康成書帶

於是周旋青徐兗豫之郊

寰宇記卷二十宋永初山川記云昌陽縣有昌水郡國記云  
昌陽縣有巨神島有祠能興雲雨崔珍避黃巾賊於此山

時未立太子臨菑侯植有才而愛太祖狐疑以函令密訪於外  
唯珍露板荅曰

何云以密函下訪乃露板以荅非所以處人骨肉之間季珪  
之禍實萌於此

珍聲姿高暢眉目疏朗鬚長四尺甚有威重朝士瞻望而太祖  
亦敬憚焉

史通暗戒篇云魏志注語林曰匈奴遣使人來朝太祖令崔  
珍在座而已握刀侍立旣而使人問匈奴使者曰曹公何如  
對曰曹公美則美矣而侍立者非人臣之相太祖乃追殺使  
者難曰昔孟陽卧牀詐稱齊后紀信乘壽矯號漢王或主邁  
屯蒙或朝曜兵革故權以取濟事非獲已如崔珍本無此急  
何得以臣代君者哉且凡稱人君皆慎其舉措況魏武經綸  
霸業南面受朝而使臣居君座君處臣位將何以使萬國具  
瞻百僚僉矚也又漢代之於匈奴其爲綏撫勤矣雖復賂以  
金帛結以親姻猶恐虺毒不悛狼心易擾如輒殺其使者不  
顯罪名復何以懷四夷於外蕃建五利於中國且曹公必以  
所爲過失懼招物議故誅彼行人將以杜茲謗口而言同綸



紆聲徧寰區欲蓋而彰止益其辱雖愚暗之主猶所不爲況  
英略之君豈其若是夫芻蕘鄙說閭巷關言凡如此書通無  
擊難而裴引語林斯事編入魏史注中持彼虛詞亂茲實錄  
故特申掎摭辨其疑誤者焉一清案世期未嘗採此事入注  
不審知幾所云何謂也

注續漢書曰融孔子二十世孫也高祖父尙鉅鹿太守父宙太  
山都尉

後漢書融傳注引融家傳曰兄弟七人融第六

注太中大夫陳煒後至

煒世說作寔

注與平原陶邱洪

後漢書史弼傳注引青州先賢傳曰洪字子休平原人清達  
博辨文冠當代舉孝廉不行辟太尉府年三十卒

注司徒大司馬辟舉高第累遷北軍中侯虎賁中郎將北海相  
大司馬一本作大將軍蓋何進也融傳辟司徒楊賜府河南  
尹何進當遷爲大將軍賜遣融奉謁賀進不時通融卽奪謁  
還府投劾而去河南官屬恥之私遣劍客欲追殺融客有言  
於進曰孔文舉有重名將軍若造怨此人則四方之士引領  
而去矣不如因而禮之可以示廣於天下進然之旣拜而辟  
融舉高第爲侍御史則司馬二字誤爾又融傳云遷虎賁中  
郎將會董卓廢立融每因對荅輒有匡正之言以忤卓旨轉  
爲議郎時黃巾寇數州而北海最爲賊衝卓乃諷三府同舉

融爲北海相秦子曰孔文舉爲北海相有父喪哭泣墓側色無憔悴文舉殺之有母病瘥思食新麥家無乃盜鄰人熟麥而進之文舉聞特賞之盜而不罪者以爲勸養於母也哭而見殺者以爲哀而不實也

注黃巾將至融大飲醕酒躬自上馬禦之涑水之上

涑水當是沐水之譌水在朱虛縣南寢宇記卷十八朱虛故城在青州臨朐縣東六十里孔融爲黃巾賊所敗曾保此城  
注左丞祖劉義遜

融傳云左丞黃祖此脫黃字其時有兩黃祖也

注丞祖勸融自託彊國融不聽而殺之

丞字衍融傳云時袁曹方盛而融無所協附左丞黃祖者稱

有意謀勸融有所結納融知紹操終圖漢室不欲與同故怒而殺之

注乃引公卿上書言其意

意一本作義

注魏氏春秋曰袁紹之敗也融與太祖書曰

融傳曹操攻屠鄴城袁氏婦子多見侵略而操子丕私納袁熙妻甄氏融乃與操書

注十二年融對孫權使有訕謗之言坐棄市

後漢書獻帝紀融以建安十三年八月見殺是時曹操南征劉表寰宇記卷百二十三孔融墓在揚州高士坊西北去州九里

注見融浮豔好作變異眩其誰詐

誰一本作誰

注受傳融論以爲父母與人無親譬若甌器寄盛其中

此卽路粹所爲奏中語見融傳

注融見收顧謂二子曰何以不辭

世說注辭字作辟

注二子俱曰父尙如此復何所辭以爲必俱死也

世說孔融被收中外惶怖時融兒大者九歲小者八歲二兒故琢釘戲了無遽容融謂使者曰冀罪止於身二兒可得全不兒徐進曰大人豈見覆巢之下復有完卵乎尋亦收至又云孔北海被收時男方九歲女纔七歲以幼弱得全寄住他

舍主人遭以肉汁男飲之女曰今日之禍豈得久活何賴知肉味乎或言於曹操收之女謂兄曰若死而有知得見父母豈非至願乃延頸就刑

注八歲小兒能元子禍福

世說注作懸了禍患

注盛以此爲美談無乃賊夫人之子與蓋由好奇情多而不知言之傷理

晉書羊祜傳祜母孔融女生兄發則戮不及嗣可知裴世期之論爲有徵也

南陽許攸

何云許攸賣國邀功小人之尤者收治之殊快也不得與北

海比

注人有白者遂見收之

之字何校改治

魏略曰婁圭字子伯少與太祖有舊

武紀潼關之役建沙城之謀者婁子伯也

由是天下之士莫不以廉節自勵雖貴寵之臣輿服不敢過度  
御覽卷二百十四傳咸集表曰昔毛玠爲吏部尙書無敢奸  
衣美食者魏武歎曰孤之法不如毛尙書今使吏部用心如  
毛玠風俗之易益不難矣

玠請謁不行時人憚之咸欲省東曹乃共白曰舊西曹爲上東  
曹爲次空省東曹太祖知其情令曰日出於東月盛於東凡人

言方亦復先東何以省東曹遂省西曹

後漢書百官志西曹主府史署用東曹主二千石長吏遷除及軍吏

桓階曰徐奕其人也太祖乃以奕爲中尉

後漢書百官志北軍中候一人六百石掌監五營宋書百官志云漢有南北軍衛京師武帝置中壘校尉掌北軍營光武省中壘校尉置北軍中候監五校營則斯時又改中候爲中尉也五校卽屯騎等五校尉皆主宿衛之兵

衛與橋樊俱攻圍新陽新陽爲太祖固守衛以夔彼郡人欲脅令說新陽

新陽漢沛國之蕪縣也而陳承祚述史屢有新陽之文豈後



漢末曾改蕪縣爲蕪陽乎又何變是陳郡人而蕪屬沛郡今云術以變彼郡人所未達也或郡人下有缺文

遷長廣太守

後漢書郡國志東萊郡長廣故屬琅邪方輿紀要卷三十六長廣城在萊陽縣東五十里建安中分置長廣郡魏晉因之變遣吏成宏領校尉長廣縣承等郊迎

承當作丞後漢書百官志郡置太守一人丞一人郡當邊戍者丞爲長史凡縣萬戶以上爲令不滿爲長丞各一人

然於節儉之世最爲豪汰

何云叔龍汰侈類考濟之詒謀一謬子孫卒受其敗不可以不戒

文帝踐阼封成陽亭侯

晉書何曾傳襲封陽武亭侯

注干寶晉紀曰曾字穎考正元中爲司隸校尉時母邱儉孫女適劉氏以孕繫廷尉女母荀氏爲武衛將軍荀顗所表恬旣免辭詣廷尉乞爲官婢以贖女命曾使主簿程咸爲議

晉書刑法志及何曾傳言魏法犯大逆者誅及已出之女母邱儉之誅其子甸妻荀氏應坐死其族兄顗族父虞與景帝姻通共表魏帝以甸其命詔聽離婚荀所生女芝爲穎川太守劉子元妻亦坐死以懷妊繫獄荀詣曾乞恩曾哀之騰辭上議一清案劉子元名仲武晉書禮志載沛國劉仲武先娶母邱氏生子正舒正則二人母邱儉反敗仲武出其妻娶王

氏生陶仲武爲母邱氏別舍而不告絕及母邱氏卒正舒求  
耐葬焉而陶不許舒不釋服訟於上下泣血露骨寢裳綴絡  
數十年不得從以至死公所云懷姪卽正則也

注晉諸公讚曰曾以高雅稱加性純孝位至太宰封朗陵縣公  
年八十餘薨諡曰元公

曾傳咸寧四年薨博士秦秀諡爲繆醜帝不從策諡曰孝太  
康末子劭自表改諡爲元

注傅子稱曾及荀顗曰以文王之道事其親者其頌昌何侯乎  
其荀侯乎古稱曾閔今日荀何內盡其心以事其親外崇其禮  
讓以接天下孝子百世之宗仁人天下之令也有能行仁孝之  
道者君子之儀表矣

困學紀聞云何曾荀顗之孝論者比之曾閔夫以孝事君則忠不忠於魏又不忠於晉非孝也顗之罪浮於曾曾之驕奢禍止及家顗之姦諛禍及天下

更辟司空掾除行唐令

漢志常山郡南行唐

鮑勛字叔業泰山平陽人也

前漢書地理志泰山郡東平陽

因奏劉晔佞諛不忠阿順陛下過戲之言昔梁邱據取媚於造臺晔之謂也請有司議罪以清皇朝

何云勛語殊壯但不聞諒陰之語漠無所動毀表行獵復問其槩何如八音心已死矣又何可與言哉亮有餘而識不足

又君子所惜也

黃初四年尙書令陳羣僕射司馬宣王並舉勛爲宮正宮正卽御史中丞也

宋百官志御史大夫有二丞其一曰御史丞其二曰御史中丞殿中蘭臺秘書圖籍在焉而中丞居之外督部刺史內領侍御史受公卿奏事舉劾案章時中丞亦受奏事然則分有所掌也獻帝時更置御史大夫自置長史一人不復領中丞也中丞每月二十五日繞行宮垣白壁史臣案後漢書百官志執金吾每月三繞行宮城疑是省金吾以此事併中丞中丞秩千石一清案宮正之名以巡行宮省得名

帝益忿之左遷勛爲治書執法

治書執法卽治書侍御史也宋志掌舉劾官品第六已上漢宣帝齊居決事令御史二人治書因謂之治書御史漢東京使明法律者爲之天下讞疑事則以法律當其是非魏晉以來則分掌侍御史所掌諸曹若尙書二丞也

司馬芝字子華河內溫人也少爲書生避亂荊州於魯陽山遇賊

前漢書地理志南陽郡魯陽有魯山古魯縣

太祖平荊州以芝爲管長

此漢濟南郡之管縣也應劭曰音姦管城唐置前漢書地理志云河南中牟有筦叔邑師古曰筦與管同

今條同等爲兵

何云條北宋本作調

注肇晉太康中爲冀州刺史尙書見百官志

何云志北宋本作名

益陽蔡芳初校

宿松羅忠濟覆校

陽湖吳朗寅再覆校

三國志注補卷十二

三國志注補卷十三

仁和趙一清撰

魏志卷第十三

鍾繇字元常潁川長社人也

寰宇記卷一鍾城在開封尉氏縣西北三十五里續述征記云魏太傅鍾繇故里城南三里有鍾繇碑又卷七鍾繇臺在許州長葛縣西十里鍾繇學書處在繇故宅中臺址猶存又有鍾繇冢張懷瓘書斷曰繇少從劉勝入抱犢山學書三年遂與魏太祖邯鄲淳韋誕等議用筆繇乃問蔡伯喈筆法於韋誕誕惜不與乃自搥胸嘔血太祖以五靈丹救之得活及誕死繇令人盜掘其墓遂得由是繇筆更妙繇精思學書臥



畫被穿過表如廁終日忘歸每見萬類皆書象之絲善三色書最妙者八分又曰繇師曹喜蔡邕劉德昇真書絕世剛柔備焉點畫之間多有異趣可謂幽深無際古雅有餘秦漢以來一人而已若其行書則羲獻之亞草書則衛索之下八分則有魏受禪碑稱此爲最也元常書有十二種意外巧妙絕倫多奇

注皓二子迪敷並以黨錮不仕繇則迪之孫

後漢書鍾皓傳繇是皓之孫注引海內先賢傳繇郡主簿迪之子與此不同

瑜以相者言中益貴繇而供給資費使得專學

世說注引魏志曰繇家貧好學爲周易老子訓今志無此語

除尚書郎陽陵令

後漢書郡國志京兆尹陽陵故屬馮翊

太祖在官渡與袁紹相持繇送馬一千餘匹給軍

一本作二千匹亦見武紀注

注魏略曰詔徵河東太守王邑

後漢書董卓傳帝御牛車因都安邑河東太守王邑奉獻繇  
帛悉賦公卿以下封邑爲列侯注云邑字文都北地涇陽人  
鎮北將軍見同歲名

太祖征關中得以爲資

關中之役由繇激成之見衛覲傳注而此傳諱之

案鼎有刻書曰王命尸臣官此栒邑

尸主事之臣枸音苟幽地

注魏略曰後太祖征漢中太子在孟津聞繇有玉玦欲得之而難公

公下何氏校增言字

注太子與繇書曰夫玉以比德君子見美詩人

文選作良玉比德君子珪璋見美詩人

注鄴騎旣到寶玦初至捧跪發匣

文選作捧匣跪發又下有五內震駭繩窮匣開八字

文帝卽王位復爲大理及踐阼改爲廷尉

隋書經籍志魏廷尉決事十卷

及文帝臨饗羣臣詔謂太祖欲復肉刑

太祖二字何氏校改大理一清案義門所改非也是時繇已爲太傅不當仍稱大理太祖之號或史家追改之文

毓字稚叔年十四爲散騎侍郎

世說鍾毓鍾會少有令譽年十三魏文帝聞之語其父鍾繇曰可令二子來於是敕見毓面有汗帝曰卿面何以汗毓對曰悚悚惶惶汗出如漿復問會卿何以不汗對曰戰戰慄慄汗不敢出又曰鍾毓兄弟小時值父晝寢因其偷服藥酒其父時覺且託寐以觀之毓拜而後飲會飲而不拜旣而問毓何以拜對曰酒以成禮不敢不拜又問會何以不拜會曰偷本非禮所以不拜

太和初蜀相諸葛亮圍祁山明帝欲西征

何云欲下御覽有親字

且盛暑行師詩人所重實非至尊動輒之時也

何云御覽作順動之時

許昌偪狹於城南以璽爲殿

何云百年爲戎璽殿兆之

正始中爲散騎侍郎

陳少章曰毓年十四卽爲散騎侍郎太和中已遷黃門侍郎矣正始中乃爲散騎常侍胡昭傳可證此云侍郎傳寫之誤後以失爽意徙侍中出爲魏郡太守

陳少章曰徙字誤當作從時侍中在常侍上不應失爽意而反得美遷當是解其近職出典外郡耳不書毓爲侍中史省

文

淮南既平爲青州刺史加後將軍

晉書魏舒傳累遷後將軍鍾毓長史毓每與參佐射舒常爲  
畫籌而已後遇朋人不足以舒滿數毓初不知其善射舒容  
範閑雅發無不中舉坐愕然莫有敵者毓謝而歎曰吾之不  
足以盡卿才有如此射矣豈一事哉

景元四年薨

隋經籍志鍾毓集五卷錄一卷

追贈車騎將軍諡曰惠侯子駿嗣

駿鍾會傳作峻

華歆字子魚平原高唐人也高唐爲齊名都衣冠無不游行市

里歆爲吏休沐出府則歸家閭門

世說華歆遇子弟甚整雖閨室之內嚴若朝典

遂從藍田至南陽

漢志京兆尹藍田

注歆曰已與俱矣棄之不義相率共還出之而後別去祇乃大義之

世說華歆王朗俱乘船避難有一人欲依附歆輒難之朗曰幸尙寬何爲不可後賊追至王欲舍所攜人歆曰本所以疑正爲此耳既已納其自託寧可以急相棄邪遂攜拯如初世以此定華王之優劣

策以其長者待以上賓之禮

何云伯符之致敬子魚猶孔明之待文休風氣所趨雖英賢亦因時以荅輿望而已

注策年幼稚宜修子弟之禮便向歆拜

此皆節詞觀吳志虞翻傳注引江表傳可見

注官屬請出郊迎歆曰無然

歆曰一本作敎曰

注虞溥江表傳曰孫策在椒邱

寰宇記卷一百六椒邱城在洪州北水路屈曲一百四十八里雷次宗豫章記云建安四年孫策起兵破劉繇於尋陽軍欲謀取豫章太守華歆所築也一清案水經贛水注云椒邱城孫策所築



今空留僕是爲養無用之物非將軍之良計也權悅乃遣飲  
姜云孫氏方網羅人物而聽子魚之去實以其爲無用之物  
耳李云此時萬不得已任權所猶愈於從操見幾不明甚矣  
臨去悉聚諸物謂諸賓客曰本無拒諸君之心而所受遂多念  
單車遠行將以懷璧爲罪願賓客爲之計眾乃各留所贈而服  
其德

御覽卷八百十九引吳歷曰孫策送華歆還洛并送越布香  
葛時多盜賊歆渡牛渚悉封還諸物

文帝卽王位拜相國封安樂鄉侯及踐阼改爲司徒

齊職儀曰司徒品秩冠服同司丞郊廟服冕同太尉漢哀帝  
從朱博議始制三司改丞相爲大司徒以孔光爲之魏以華

歆爲之

注華嶠譜敘曰文帝受禪朝臣三公已下並受爵位歆以形色忤時徙爲司徒而不進爵

姜云登壇相儀之人豈能嚴色忤時且譜出華氏子孫何足徵信又云華歆一時名士晚節披猖至牽伏后出壁黨惡與弑應知平時整暇與閤門振肅皆枝葉耳大本旣喪何論細行何云此華嶠之飾詞歆不恥爲魏相國又何忤哉發壁牽后誰所爲也

注歆乃自知當爲公

梁簡文大同哀辭曰華歆所聞之語已定北陵之期卽用此事但歆封博平而云北陵未詳

注華嶠譜敘曰歆有三子表字儀容年二十餘爲散騎侍郎

晉書華表傳年二十拜散騎黃門郎累遷侍中正元初石苞來朝盛稱高貴鄉公以爲魏武更生時聞者流汗沾背表懼禍作頻稱疾歸下舍故免於大難

注表有二子

表傳云有六子此下惟舉虞嶠澹而不及岑鑒簡則亦當作三子云二子誤

注晉諸公贊曰虞有文翰

晉書虞傳虞宏敏有才義妻父盧毓典選難舉姻親故虞年三十五不得調晚爲中書通事郎泰始初遷冗從僕射少爲武帝所禮歷黃門侍郎散騎常侍前軍將軍侍中南中郎將

都督河北諸軍事免官棲遲家巷垂十載教誨子孫誦經  
典集經書要事名曰善文行於世

注嶠字叔駿有才學撰後漢書世稱爲良史爲祕書監尙書

晉書華嶠傳以漢紀煩穢慨然有改作之意會爲臺郎典官  
制事由是得徧觀祕籍遂就其緒起光武終孝獻百九十五  
年爲帝紀十二卷皇后紀二卷十典十卷傳七十卷及三譜  
序傳目錄凡九十七卷嶠以皇后配天作合前史作外戚傳  
以繼末編非其義也故易爲皇后紀以次帝紀又改志爲典  
以有堯典故也而改名後漢書奏之藏之祕府所撰十典未  
成而終祕書監何劭奏嶠中子徹爲佐著作郎使踵成之未  
竟而卒後監繆徽又奏嶠少子暘爲佐著作郎克成十典永

嘉喪亂經籍遺沒嶠書存者五十餘卷

注虞三子昆字敬倫

虞傳昆作混

王朗字景興東海郡人也

世說注引魏書云東海鄉人

朗會稽太守

後漢書郡國志會稽郡烏傷注越絕曰有常山古聖所采藥  
高且神英雄交爭記曰初平三年分縣南鄉爲長山縣長山  
卽常山也縣以山受氏正朗爲太守時矣

注朗家傳曰

隋經籍志有王朗王肅家傳一卷

太祖表徵之

世說王充論衡中土未有傳者蔡中郎到江東得之恆祕玩以爲談助注引袁山松後漢書云其後王朗爲會稽太守又得其書時人稱其才進或曰不見異人當得異書問之果以論衡之益

及文帝踐阼改爲司空

鼎錄王朗爲司空鑄一鼎其文曰司空鼎複篆書

注魏名臣奏

隋經籍志魏名臣奏事四十卷目一卷陳壽撰

注並高棟夏屋足以肆饗射

肆當作肆

注王朗集

隋經籍志王朗集三十四卷

注今以登爲太官令

後漢書百官志太官令一人六百石掌御飲食

朗薦光祿大夫楊彪且稱疾讓位於彪

何云歆薦寧朗薦彪徒欲汙染遺逸以分損謗議又何能答

曹人之刺乎

句踐欲廣其禦兒之疆

水經漸江水注浙江又東逕禦兒鄉萬善歷曰吳黃武六年  
由拳西鄉有產兒墮地便能語云天方明何欲清鼎腳折金  
乃生因是詔爲語兒鄉非也禦兒之名遠矣蓋無智之徒因

藉地名生情穿鑿國語曰句踐之地北至禦兒是也安得引黃武證地哉韋昭曰越北鄙在嘉興一清案漢書兩粵傳注孟康曰今吳南亭是蓋春秋爲越北鄙至漢入吳南境耳朗著易春秋孝經周官傳奏議論記咸傳於世

晉禮志漢魏之禮公主居第尙公主者來第成婚司空王朗以爲不可其後乃革

注肅父朗與許靖書云肅生於會稽

御覽卷六百五引顧野王輿地志王朗爲會稽太守子肅隨在郡住東齋中夜有女從地出稱越王女與肅語曉別贈一丸墨肅方注周易因此才思開悟酉陽雜俎云王肅造逐鼠丸以銅爲之晝夜自轉



乃漢之初

乃疑作及

可復五日視朝之儀使公卿尙書各以事進

何云肅此奏欲漸革政歸臺閣之弊乃當日之急務又欲轉移無迹故但以復五日一朝之儀各以事進爲言蓋臨朝奏事面取裁決則尙書不得專執大柄可否任心矣

注肅之所云蓋就漢制而爲言耳謂之爲謬乃是譏漢非難肅也

何云肅之說出於蔡邕然秦尊莊襄王爲太上皇漢沿其名未必爲其貴而無位高而無名也

後肅以常侍領祕書監兼崇文觀祭酒

御覽卷二百三十三載王肅表曰青龍之末主者啟選祕書  
監詔祕書騶吏以上三百餘人非但學問義理當用有威嚴  
能檢下者詔肅以常侍領焉又載王肅祕書不應屬少府表  
曰魏之祕書郎漢之東觀郡國稱敢言之上東觀且自大魏  
分祕書而爲中書以來名稱相繼於今三監未有隸名於少  
府者也今欲使臣編名於騶吏隸言於外府不亦隳朝章而  
辱國典乎太和之中蘭臺祕書爭議三府奏議祕書司先王  
之載籍掌制書之典謨與中書相亞宜與中書爲聯官又曰  
青龍中祕書丞郎與博士議郎同職近日月宜在三臺上祕  
書丞郎乘鹿車猶用尺奏恐非陛下崇儒之本意也臣以爲  
祕書職於三臺爲近密中書郎在尙書丞郎上祕書丞郎宜

次尙書郎下不然則宜次侍御史下祕書丞郎俱四百石遷宜比尙書郎亦出宜爲郡此陛下崇儒術之盛旨也尙書郎侍御史皆乘犢車而祕書丞郎獨鹿車不得朝服恐非陛下轉臺郎以爲祕書丞郎之本意也

此爲隱切在孝武而不在於史遷也

何云子雍所對本之衛敬仲與班氏所記不同敬仲所記非寔於時主則爲善對

甘露元年薨

寰宇記卷二十三王肅墓在沂州承縣東南二十五里

咸熙中開建五等以肅著勳前朝改封恂爲承子

肅女適司馬文王故嗣爵無替又前漢書地理志承屬東海

郡應劭音證字本作丞以承水所經而名今本作承非也

初肅善賈馬之學而不好鄭氏采會同異爲尙書詩論語三禮左氏解及撰定父朗所作易傳皆列於學官

隋經籍志有王肅周易注十卷尙書注十一卷尙書駁議五卷毛詩注二十卷毛詩義駁八卷毛詩奏事一卷毛詩問難二卷周官禮注十二卷儀禮注十七卷喪服經傳注一卷喪服要記注一卷禮記注三十卷禮記音一卷又撰祭法五卷明堂議三卷春秋左氏傳注三十卷春秋外傳章句一卷孝經解一卷王肅解論語注十卷論語釋駁三卷又孔子家語二十一卷王肅解

其所論駁朝廷典制郊祀宗廟喪紀輕重凡百餘篇

晉書禮志魏氏光宅憲章斯美王肅高堂隆之徒博通前載  
三千條之禮十七篇之學各以舊文增損當世豈所謂致君  
於堯舜之道焉世屬雕牆時逢秕政周因之典務多違俗而  
遺編殘冊猶有可觀者也景初元年營洛陽南委粟山以爲  
圓丘祀之日以始祖帝舜配房俎生魚陶樽元酒非搢紳爲  
之綱紀其孰能與於此哉水經汾水注王肅喪服要記曰昔  
魯哀公祖載其父孔子曰寧設桂樹乎哀公曰不也桂樹者  
起於介子推子推晉之人也文公有內難出國之狄子推隨  
其行割肉以續軍糧後文公復國忽忘子推子推奉唱而歌  
文公始悟當受爵祿子推奔介山抱木而燒死國人葬之恐  
其神魂實於地故作桂樹焉吾父生於宮殿死於枕席何用

桂樹爲余案夫子尚非璠璣送葬安能問桂樹爲禮乎王肅此證近於誣矣

肅集聖證論以譏短玄

隋經籍志王肅撰聖證論十二卷王子正論十卷王肅集五卷錄一卷

叔然駁而釋之及作周易春秋例毛詩禮記春秋三傳國語爾雅諸注又注書十餘篇

隋經籍志孫炎注有禮記三十卷爾雅七卷又有爾雅音二卷舊唐書元行沖傳開元初魏光乘請用魏徵類禮上令行沖集學者撰義疏將立學官張說駁奏禮記歷代傳習已向千年不可刊削至魏孫炎始改舊本以類相比有同鈔書先

儒所非魏徵更加整比兼爲之注若欲行用竊恐未可上然其奏留書內府

自魏初徵士燉煌周生烈注臣松之案此人姓周生名烈何晏論語集解有烈義例餘所著述見晉武帝中經簿

後漢書有周生豐見馮衍傳注引風俗通云周生姓也羅泌路史後紀曰燉煌實錄魏侍中周生烈本姓唐外養周氏因爲姓亦見七錄及中經簿隋經籍志周生子要論一卷錄一卷魏侍中周生烈撰案烈爲張旣辟舉見旣傳

注宏農王卽昨旣淺又爲暴臣所制降在藩國不應謁太祖乃過

何云宏農雖未踰年然嘗北面臣之則故君也遇謂不應謁

者非

注由是諸生少從遇學無傳其朱墨者

隋經籍志魏大司農卿董遇注周易十卷孔穎達春秋左氏傳序正義曰中興以後陳元鄭眾賈逵馬融延篤彭仲博許惠卿服虔穎容之徒皆傳左氏春秋魏世則王肅董遇爲之注一清案春秋正義多引董遇本以正異同則其書唐時猶未亡也

注賈洪字叔業京兆新豐人也好學有才

何校本好學上增家貧二字從御覽補

注唯洪與馮翊嚴苞交通

交當作文苞字文通也



注辭夏字宣聲天水人也

拾遺記辭夏博學絕倫母孕夏時夢人遺一篋衣云夫人必產賢明之子爲帝王所崇母記所夢之日及生夏弱冠才辯過人魏文帝與之講論終日不息應對如流無有凝滯帝曰昔公孫龍稱爲辯捷而迂誕誣妄今子所說非聖人之言不談子游子夏之儔不能過也若仲尼在魏復爲入室焉帝手製書與夏題云入室生位至祕書丞居甚貧帝解御衣賜之果符所夢名冠當時爲一代高士

注至太和中嘗以公事移蘭臺

晉書職官志殿中侍御史案魏蘭臺遣二御史居殿中伺察非常卽其始也魏晉官品令又有禁防御史第七品亦蘭臺

之職也符節御史秦符璽令之職漢因之至魏別爲一臺位  
次御史中丞

注蘭臺屈無以折

何校本折下增之字

注魚豢曰學之資於人也其猶藍之染於素乎故雖仲尼稱曰  
稱一本作猶是也

注蘇林事在劉邵高堂隆傳樂詳事在杜畿傳

顏師古漢書敘例張晏字子博中山人次張揖蘇林之後如  
淳孟康之前是三國魏人敘例張揖字稚讓清河人一云河  
間人魏太和中爲博士止解司馬相如傳一卷隋經籍志廣  
雅三卷埤蒼三卷古今字詁三卷難字一卷錯誤字一卷並

三國志注補卷十三  
魏博士張揖撰又曹魏時博士張融難王肅以五帝非黃帝  
子孫相續次見詩生民篇正義

益陽蔡芳初校

宿松羅忠濟覆校

陽湖吳翊寅再覆校